

吾

學

編

皇明名臣記第八卷

吾學編第二十九

海鹽鄭曉

左春坊大學士解公

公名縉字縉紳吉水人洪武二十一年進士選中書庶吉士大庖西上封事論時政剴切萬言其畧曰陛下挺生南服一統華夷功高萬古旣無女寵外戚寺人藩鎮之患又無貨利聲色遊畋玩好之欲旣皆遠過於漢宋又何遜讓于唐虞惟願陛下下以天地爲一體以天下爲一人令出惟行也不宜於數改刑期于無刑也寧失於不經故令數改

則民疑疑則不信刑太繁則民玩玩則不清立國
至今將二十載無幾時無變之法無一日無過之
人良由誠信有間用刑太繁也臣見陛下好觀說
苑韻府雜書與所謂道德心經者臣切謂甚非所
宜也說苑出于劉向向學不純溺于妄誕所取不
經且多戰國縱橫之論壞人心術莫此爲甚韻府
出元之陰氏鄙猥細儒學孤識陋蠅集一時兎園
寒士抄緝穢蕪畧無可采陛下若喜其便於檢閱
則願集一二志士儒英臣請得執筆而隨其後上
泝唐虞下及殷周根實精明隨事類別刪其無益

勒成一經豈非太平制作之一端歟禮記出於漢
儒蕪雜尤甚宜及時刪改日御經筵訪求審樂之
儒大備百王之典作樂書一經以惠萬世若夫配
天宜復掃地之規尊祖宜備七廟之制奉天不宜
爲筵宴之所文淵未備夫館閣之隆太常非俗樂
之可肄官妓非人道之所爲禁絕娼優俾於變之
民不遷於淫巧易制閣寺尊天子之貴不近於刑
人執戟陞墀皆爲吉士虎賁趨馬悉用俊良雖門
戶掃除之役命公卿子弟之賢任諸侯王於衆職
定久任法而加封木輅朴居而土木之工勿起佈

墾荒田而四夷之地勿貪釋老之壯者聖之俾復
於人倫經呪之妄者火之俾絕其欺誑斷所謂瑜
珈之教禁所謂符式之科絕鬼巫破淫祀省冗官
減細縣痛懲法外之威刑永革京城之工役流年
而聽復杖八十以無加婦女非帷薄不修毋令逮
係大臣有過惡當誅不宜加辱治曆明時授時作
事但伸播植之宜何用建除之謬伏見陛下拳拳
於畏天畏鬼神而所謂畏民者則未至也孳孳於
治民治強暴而所以治心者猶未至也染盛之潔
衣服之齊脩舉之時儀文之脩此畏天畏鬼神之

末事也簿書之期獄訟之斷詔誥之勤鈞鉅之巧
此治民治強暴之支流也近年以來臺綱不肅以
刑名輕重爲能事以問囚多寡爲勛勞甚非所以
厲清要長風采也夫人自救過之不給何暇劾人
之過人自以言爲諱何能有諫諍之言御史糾彈
皆承密旨未聞舉善但曰除奸蓋入人之罪或謂
無私而出人之罪必疑受賄逢迎甚易而或蒙褒
營救甚難而多得禍也陛下進人不擇于賢否授
職不量于重輕建不爲君用之法所謂取之盡錫
銖置奸朋倚法之條所謂用之如泥沙監生進士

經明行修而多困于州縣屈于下僚孝廉人材冥
蹈瞽趨而咸布于朝省驟歷清華椎埋器悍闖茸
下愚者朝指刀攝暮擁冠裳左棄筐篋右綰組符
剔屨之賤衮繡巍我負販之傭輿馬赫奕雖曰立
貴無方亦豈忱詢有德古者鄉鄰善惡必記今雖
有申明旌善之舉而無黨庠鄉學之規互知之法
雖嚴訓告之方未備紀綱不立節目無張臣欲取
古人治家之禮睦隣之法若古藍田呂氏之鄉約
今義門鄭氏之家範布之天下世臣大族率先以
勸旌之復之爲民表率此不可視爲迂闊而不切

當今之急務也陛下天資至高合於道微百家神
怪誕妄恍惚無不洞瞞其謬然猶不免欲以愚弄
天下若所謂以神道設教者臣謂不必然也所謂
傳國寶者臣考按前史焚燬久矣屢求屢得真僞
莫明即真有之區區李斯之書秦政之制何足爲
寶哉地有盛衰物有盈歟而商稅之徵率皆定額
盈也奸黠得以侵欺歟也良善困於補納夏稅一
也而茶椒有糧菓絲有稅既稅於所產之地又稅
于所過之津何其奪民之利如此之密也且多貧
下之家不免拋荒之咎或疾病死喪進亡棄失今

日之土地無前日之生植而今日之徵聚有前日之稅糧里胥不爲呈州縣不爲理或賣產以供稅產去而稅存或徯辦以當役役重而民困又土田之高下不均而起科之輕重無別或膏腴而稅反輕瘠鹵而稅反重欲拯其困而革其弊莫若行授田均田常平義倉之法積之以漸至有九年之食無難者王公設險以守其國近世徂于晏安隳名城銷鋒鏑禁兵諱武以爲太平一旦有不測之虞連郡至望風而靡武備隳之過也及今脩治不宜動衆但勅有司以時整葺開武舉以收天下之英

雄廣鄉校以延天下之俊又古時多有書院遺基
學田舊業貢士有庄義田有族皆宜興復而廣益
之夫罪人不孥罰弗及嗣連坐起於秦法孥戮本
於僞書今之爲善者妻子未必蒙榮有過者里胥
必蹈其罪况律以人倫爲重而有給配婦女之條
聽之於不義則又何取夫節義哉尚書侍郎內侍
也而以加於六卿郎中貲外郎何職也而以名爲
六屬御史詞臣所以居寵臺閣郡守縣令不應回
避鄉邦同寅協恭相倡以禮而今內外百司捶楚
屬官甚於奴隸是致柔懦之徒蕩無廉耻之節一

爲下官肌膚不保甚非所以長孝行厲節義也臣
但知罄竭愚衷欲言固不止此急於陳獻畧無次
序亦不暇組織成文冀以將來取譽惟 陛下幸
垂鑒焉 上覽之喜公少年有才志封事留中諸
大臣皆忌公 上顧數稱公奇才兵部尚書沈潛
忌公年少得 上意乞改公御史使遠 上公在
臺嘗爲王國用草諫書雪韓國公爲詹徽所嫉已
又爲夏長文作劾都御史袁太䟽太切齒恨公公
又時時敢直言竟坐深文得罪且不測 上憐公
召對便殿慰諭賜鎗曰汝歸且讀書十年著述冠

帶來廷又命公修正元史誤及踵成朱書刪定禮
經凡例皆留中公歸家八年上崩來奔喪有司
勅公母喪未葬父年九十達詔奔喪謫河州衛吏
建文元年召入翰林待詔靖難後召公及黃淮立
御榻左備顧問遂命居內閣未幾又召胡廣楊士
奇金幼孜胡儼楊榮陞公侍讀不數日進侍讀學
士七人並直文淵閣內閣與機務之名自此始永
樂初重修高廟實錄克總裁官又修永樂大典
古今列女傳諸書上寵公信用賞賚輒與六卿
等當是時儲位未定上密詢公公稱世子仁孝

天下歸心以華奪宗自古致亂 上不應又頓首

曰好聖孫 上曰已喻逾年冊世子爲太子進公

翰林學士兼左春坊大學士初議頗洩丘福等謗

公洩禁中語高煦大恨欲殺公未幾用兵交趾公

力言交趾古羈縻國通正朔時賓貢而已得其地

不足郡縣 上遂疎公出爲廣西叅議李至剛奏

公怨望改交趾永樂八年入奏事南京會 上北

征見 東宮辭去高煦密疏言公瞰 上出塞輒

遠覲儲君徑歸無人臣禮 上怒逮公并至剛下

詔獄十二年正月公卒獄中藉其家妻子徙遼東

至剛不死 仁宗時以宮臣得爲通政尋亦謫遠

郡初 成祖寵信公手書倚任大臣十人蹇義等

名授公曰汝疏其人品十人者皆與公厚善公具

實封對義天資厚重中無定見髮原古有德有量

不遠小人劉儔雖有才幹不知顧義鄭賜可謂君

子頗短於才李至剛誕而附勢雖才不端黃福秉

心易直確有執守陳瑛刺於用法好惡頗端朱禮

難直而苛人怨不恤陳治疏通警敏亦不失正方

賓簿書之才駟僧之心奏上 成祖以示東宮曰

至剛朕已洞燭餘餘驗東宮因問公建文君所用

人何如對曰此皆洪武中人材事往已不足論又問尹昌隆王汝玉對曰昌隆君子而量不宏汝玉文翰不易得惜有市心耳東宮即位出公奏示西楊曰今人率謂縉狂士觀所論評皆有定見也赦妻子還鄉官其子禎中書舍人正統元年又盡還其沒產公結髮讀書留心經濟任事直前風生電發早遇聖明名動天下晚罹讒毒中道天闕不盡其用其重義輕利遇人憂患疾苦輒隱於心苟可用力盡意爲之篤於故舊及名賢世家之後喜引拔士類或謂其汎愛者終不爲變襟宇闊畧不肖

意細故而表裏洞達絕崖岸雖野夫穉子皆樂親之求文翰者日輻輳率與之無倦意或言有不當與者笑曰雨露豈擇地而施哉文雄勁奇古新意疊出敘事高處逼司馬子長韓退之詩豪宕豐贍似李杜其教學者恒曰寧爲有瑕玉勿作無瑕石書小楷精絕行草皆佳。

少保黃文簡公

公名淮字宗豫永嘉人洪武三十年進士爲中書舍人靖難後上坐奉天門左室召見訪政務稱旨每朝解縉及公立御榻左備顧問或至夜分

上親即賜坐榻前論議密務不數日令入內閣專掌制勅既又選五人與共事名直文淵閣是秋陞編修進侍讀立東宮陞左庶子永樂五年陞右春坊大學士兼侍讀進講東宮太孫立又兼輔太孫六年命蹇義金忠西楊及公留守上稱太子仁厚有識留汝四人佐太子明年上北狩又明年上征胡長沙妖人李法良反太子遣豐城侯彬討法良漢廢人忌沮太子譖彬公侍太子卒遣彬擒法良十一年上再北狩公復留守庶人日夜謀奪嫡造飛語動搖監國并中傷公十二年坐公

奉表迎

上不敬逮詔獄凡十年獄中有省愆集

自省錄獻陵即位出獄中陞通政使兼武英殿大學士仍入內閣洪熙元年陞少保戶部尚書大學士如故支三俸辭尚書俸獻陵大漸太子在南京未至深機卒禍中外洵洵西楊及公佐鄭襄二王監國侯太子至公憂危嘔血宣德元年漢庶人反公留佐二王監國班師始還第二年秋公請老上賜葬公父來謝賜遊西苑與公侯伯師傅尚書十一人俱肩輿登萬歲山宴山麓比辭又宴太液池諭公曰明年朕生日卿其復來至期公至上

喜八年禮部會試貢士 上命公與少詹事兼侍
讀學士王直克考試官十年景陵崩公奔喪留逾
月辭歸正統十四年卒年八十三謚文簡永樂初
黨獄大起南人避北官者又有編戍法公言不可
阿魯台歸欵欲并女真吐蕃東西諸部落聽其約
束請朝廷出誓詞鑄金定集諸酋磨酒中飲爲盟
衆議且從之公言夷虜勢分易制併力一心後患
滋大此奸謀不可許 文皇善公言顧左右曰淮
如立高岡遠覽爾輩直平地見目前耳賜大寶法
王玉章示公璞公言朝廷賜外夷用勅命廣運二

寶此璞大於二寶夷人將謂法王尊於朝廷矣皆從公言初與公並入閣者七人胡儼早休胡廣先卒解縉沒詔獄惟西楊秉鈞最久東楊謀幄最密並總修累朝實錄而公園土十年家食餘二十年蒙詬簡牘君子弗信也

少師胡文穆公

公名廣字光大廬陵人父子琪洪武三年爲御史疏請遷都關中已而出爲按察僉事調知彭州陞延平知府卒建文二年靖難兵起公對制有曰親藩陸梁人心不搖建文君喜擢進士第一更名靖

爲修謬翰林靖難後召入內閣陞侍講復名廣改
侍讀陞右庶子永樂五年進翰林學士兼左春坊
大學士勅吏部廣等侍朕日久繼今考滿勿改外
任十二年十一月命公及文敏文靖纂修五經四
書性理大全明年九月書遂成尋進文淵閣大學
士兼坊學再從上出塞征胡上時召帳殿語
移時或夜漏數刻遣出道中相失必急遣兵騎肆
出尋諸學士時時顧左右問諸學士來未公不知
兵以文墨論議侍上備顧問上不得諸學士
相與語不悅也公敦質簡重持大體存心愛人

上諒其朴厚信任亞於東楊禁廷應對慎密不洩
操履清謹公退輒杜門讀書賦詩寡交遊崇儉素
爲文下筆滔滔制命典冊多出其手禮部郎中周
訥請封禪公力言封禪非禮上斥訥言公因上
却封禪頌奔母喪還朝上問民間疾苦公頓首
對曰百姓頗安給惟有司窮治建文時奸黨枝附
扳連坐誣善良甚苦上立命罷追詰者人或毀
公上不信或遽斥去毀者公善書行草尤善十
六年卒贈禮部尚書謚文穆已而念公官其子種
翰林檢討獻陵加贈少師西楊曰我朝文臣有謚

自姚公廣孝及公始然建文時嘗謚王公律文節

少保金文靖公

公名善字幼孜以字行新淦人建文元年進士乙
科授戶科給事中靖難後入內閣改檢討數月陞
侍講時翰林坊局臣日講經史東宮凡經義皆內
閣閱正呈上覽已進講緝閱書士奇閱易廣閱
詩公閱春秋上太子春秋直指三卷五年陞右諭
德兼侍講七年扈巡北京八年從上征虜上
歷指所過山川諭公記之登野狐嶺曰至此看山
盡在下矣至興和曰汝觀地勢遠望似高近即漸

平此陰山脊也若因山爲塹因壑爲池守茲巖險
雖鐵騎千群安能飛度耶次鳴鑾戍曰此大伯顏
山其西北小伯顏山東北即開平次環瓊圃指塞
北山川曰古交河在哈刺火州兩河相交水嚙沙
出唐碑尚在次小甘泉曰女直有山其顛有水色
白草木虎豹色皆如之所謂長白山也至長清塞
曰此南望北斗矣經闊灤海曰此周千餘里幹難
臚胸凡七河注其中賜名玄冥池次通川甸遙指
海上石山曰此即三石山十一年扈巡北京從征
虜十二年復從北征陞翰林學士兼諭德十四年

還南京明年扈巡北京十八年陞文淵閣大學士
兼翰林學士二十年扈從北征二十二年復從征
北次開平 上曰朕夢神人語朕上帝好生者三
是何祥也公時聞軍中有訛言因力請班師 上
曰善立命公草詔還次清寧鎮宴群臣命內侍歌
高皇詞五章曰此 先帝垂諭敎創業守成之難
戒荒淫酣酗之失朕嗣鴻業惟恐失墜尚相與勉
之遂廣五章言奉天法祖勤政恤民事命內侍歌
之榆木川之變東楊南計公留軍中護喪 太子
即位進戶部右侍郎兼大學士踰月陞太子少保

燕武英殿大學士賜繩愆糾繆銀圖書洪熙元年
陞禮部尚書文三傳當是時法司論死罪多寃

上命臨決必三大學士會議奏公知律例多平反
未幾還省母母卒景陵起公服中爲總裁官修

兩朝實錄明年持節出寧夏冊慶府兩郡王妃還
上封事從上巡邊度鷄鳴山上曰唐太宗特

其英武征遼嘗度此山公對曰太宗尋悔是役以
故建憫忠閣至宣府還宣德六年卒贈少保謚文
靖公簡易沈默溫裕有容不肯伐善爭名爲文和
平寬綽類其人子昭伯宣德二年進士

太保高文義公

公名穀字世用揚州興化人永樂十三年進士改翰林庶吉士授中書舍人二十二年改春坊司直郎洪熙初爲翰林侍講正統元年楊文貞公薦公學術醇正克講官修實錄五年陞侍講學士十年入內閣陞工部右侍郎兼前職十四年上北征曹文忠公從行公居守景泰初進尚書工部兼翰林學士是年虜數請使迎上皇侵我上谷雲中急廷議相顧忌不能決中書舍人趙榮穀然獨請往公壯榮解金幣贈榮曰子忠義人也上皇將

至京公言奉迎禮宜厚會有千戶龔遂榮投匿名書公所公袖入朝傳示群公卿群公卿不敢出一言言官疏聞上不喜詰匿名書從何所得公曰得自臣所遂榮恐累公自縛闕下下詔獄上亦不深罪遂榮也二年進少保東閣大學士明年廢東宮爲沂王而立懷獻爲太子公悲憤不敢爭加公太子太傅公亦不敢辭是時內閣不相能公上疏言內外諸司惟賢是用况經筵日講關係聖德尤在得人遂薦大理少卿陳詢侍講楊鼎元日講官左都御史王文大理卿蕭維禎庶子王恂入內

閣上令詢昂侍經筵文遂得入內閣文既入內閣又輒與公相擠五年敕公視南畿災尋還朝力救都給事中林聰得不死七年進少保大學士謹身殿是年首相陳循及王文皆以子不得舉訐順天考鄉試官劉文介公儼上令公覆試公曰貴冑與寒畯爭進已不可況從而爲之辭奏片林廷一人事遂已裕陵復辟內閣諸臣皆流放竄殛惟公以忠謹故英宗曰敕在內閣每議迎駕及南內事輒左右朕敕無他腸可致仕公既歸田杜門不接賓客人有問及正統景泰天順間事者輒不

應公官至台鼎而家業蕭然敝廬瘠田僅足衣食
身沒未幾子孫貧窶其方毅端靖潔廉無私卓然
有古大臣之風一時內閣七人議論每相齟齬公
獨持正嘗曰清議可畏以是見忌於人亦以是受
知裕陵成化初姚文敏公旣請謚王佐鄭埜又上
言公鯁直不回端亮有守始以翰林學士侍 英
宗經筵入內閣輔政孜孜爲國恪持公論景泰間
力主遣使迎鑒之議及其還駕獨建備禮郊迎策
天順初以老疾乞歸田里遂卒于家進退有道始
終不渝加之贈謚庶表臣節得贈太保謚文義

太常岳文肅公

公名正字季方進士及第授編脩景泰三年遷左
贊善兼編脩天順元年改兼脩撰王忠肅公薦公
宰相材召對文華殿公神采秀發上遙見遂曰
好公登殿又曰好好問年幾何對曰四十又曰正
好問家安在對曰潮縣曰又朕北方人甚善問讀
何經對曰尚書曰是書經尤善問舉進士科對曰
正統十三年上益喜曰朕固取汝朕今用汝內
閣許彬老矣不足恃汝爲朕努力公頓首受命出
赴閣至左順門遇石亨張軫愕然問曰何爲至此

公不對二人者忌公才名比見 上上又言朕今
擇一內閣臣甚佳二人者請爲誰 上曰岳正顧
正官小須與吏部左侍郎兼翰林學士二人者陽
頓首賀 陛下旣得人俟果稱職進官未晚 上
默然然時時召見公公感知遇銳意功名欽天監
湯序奏災異請盡去奸臣 上問公對曰奸臣無
主名即求之人人自危且序術疎淺不足信事遂
止亨與豎吉祥表裏擅權有匿名投書指斥時事
罪狀吉祥獨不及亨吉祥怒力請 上榜購告捕
者官三品公與呂文懿公見 上曰爲政有體朝

廷豈可自榜購募秦始皇杜諫下妖言誹謗令竟
不聞其過以亡國乞以秦爲戒事遂止公又言曹
石驕橫不早制恐禍起肘掖上諭公汝往告朕
意公徑造亭所諷令戢斂二人者謂公許我短顧
以 上意劫我益大恨是年承天門災下詔罪已
公歷數政弊詞極切直二人者造飛語岳正草詔
出時時對人言此非 上意我欲諷 上改過也
正賣直訕君父不數日內批降公欽州同知欽並
南海瘴毒公便過家辭毋留數日兵部尚書陳汝
言者黨二人又憾公嘗言其不可用遂嗾邏者中

公私事逮詔獄考掠謫戍肅州鎮夷所未及行李
鐸都督竟奪公廬時猛虎石者太監鎮河西上
密諭石正須生不須死四年石坐法誅明年曹又
反誅上思公言解士伍放歸田茂陵即位言官
請復公官吏部擬調南京上曰勿調留院克經
筵講官預修先朝實錄未幾南陽欲薦公南國
子祭酒公不應忌者僞爲公劾南陽章示南陽遂
大疑公成化元年廷推公及禮科都給事中張寧
爲兵部清黃官不得陞興化知府公至興化勤力
民事操利權興修水利積穀出羨餘補助民役興

化士人觀利弗遂者騰謗書彭惠安公獨曰太守
節財愛民無他也三年來朝乞致仕時季錫敗朝
廷還公故廬未幾卒公文章氣節名滿海內抱負
經濟屹屹不肯下人再起再廢竟不盡其用嘉靖
中贈太常卿謚文肅公自贊有自京師來者傳天
語於甘曰岳正倒好只是大膽或以賀正曰上
念公如此行召公矣曹生爲寫陋容遂隱括其詞
題於上曰岳正倒好只是大膽惟帝念哉必當有
感如或赦汝再敢不敢臣常誦古人之言蓋將之
死而靡憾也公偉貌美髯言論灑灑動循矩度石

曹事或議其迂又曰未信而諫直應曰渠謂我諫
官耶我道當如是人有不可意事雖權貴人當言
即言無藏宿以故奇公者雖多忌者亦衆所著有
類博稿

論曰解公才高志銳受知三朝皆遭讒忌竟殞其
身黃公纔脫縲絏不一二年遂屏迹丘園尤不免
于媚媚之口胡公金公入奉絲綸出從羈勒軍旅
之事不及東揚而隨事獻納裨補亦多高公素稱
忠實遣使迎鑾之議尤壯岳公負才氣直前事
仆而復起益不屑下人皆磊落賢輔臣也

皇明名臣記第八卷終

子履準校正

皇明名臣記第九卷

吾學歸三

海鹽鄭曉

太子賓客胡公

公名儼字若思南昌人洪武二十年鄉舉明年會試乙科授華亭教諭時年尚少抗師道訓勵諸生敦行檢爲講說經史寒暑不廢內艱服闋改長垣乞便養親改餘干者令建文元年薦陞桐城知縣心存撫字政尚寬平蠲逋賑乏除虎驅蝗表祀循良歷有惠績四年兵事甚棘御史大夫練安薦公學足以達天人之際智足以資帷幄之籌必拔用

之乃知臣言不妄下吏部召公比至京靖難兵渡江矣文皇即位擇翰林官吏部薦公上曰儼曉天文宜令欽天監試遂翰林俱事欽天監言公果通象緯及風雲氣候解縉又薦公遂授翰林檢討與縉等七人同直內閣尋陞侍讀公每承顧問應對從容至論成敗得失之故必反復明切上爲傾聽永樂二年陞左諭德兼侍讀外艱去詔奪情道過南京入見東宮詢及民情所對皆救時急務公持論少戇亦能委曲以全交諸同事人顧不能容薦公學行堪爲師表陞國子祭酒出內閣公

率以身教士心翕然嚮慕 上幸太學御尋倫堂
賜坐講經 上俯聽甚說賜養優厚六年薦修撰
吳溥爲司業八年 上北征以祭酒兼侍講掌翰
林院事輔導皇太孫監國鎮密謹敕上下無間言
洪熙元年春以疾乞休賜璽書加授太子賓客致
仕復其子孫公在國學二十餘年敦尚恩義時諸
生托故告歸者法坐戍邊公申論得免公旣出內
閣雖不復預機務諸大臣不自安凡朝廷制作修
太祖 實錄永樂大典天下圖誌皆推公總裁歸
田後乞修白鹿書院及春秋祀許遜章丹家食二

十餘年年八十三卒於自處淡薄衣食僅足閒居
日與學者講求問學方岳重臣待以師禮由然終
日言不及私其處是非利害可否之間審度情理
務求相安群倫中有不如意即引退不與辯以故
所至敬愛之公資性朴諒問學談博凡天文地理
曆律醫卜皆通其說文章簡質不事辭藻晚年沉
潛性理克養益粹言行愷愷稱耆俊焉

侍郎薛文清公

公名瑄字德溫河津人年十二能詩賦既壯讀周
程張朱諸書遂焚所作詩賦專心性理之學至忘

寢食永樂十九年進士擢御史監湖廣銀場手錄
性理大全晨夜玩讀潛思有得秉燭疾書深探密
玩或通宵不寢正統元年初設提學憲臣出爲會
事山東誨育生徒翕然愛敬王振問三楊吾儕誰
可爲大臣者皆薦公召爲大理右少卿三楊以用
公出振意欲公一見振公正色曰安有授官公朝
而拜恩私門耶振聞憾公會有獄夫病死三年其
妾欲嫁其私人王山山振姪也妻在禁妾弗得嫁
遂誣妻毒殺夫下御史獄坐妻死公辨其寃三駁
臺官誦事振又曲庇御史劾公受賄棄律出人死

請廷鞠振喜曰是因應死竟坐公死繫獄公怡然
讀易不輟得大臣伸救又家人乞代死得免歸田
居家六年造詣益邃十四年給事中程信薦起爲
大理丞分守北門禦虜景泰元年督川雲轉餉貴
州尋陞南京大理卿蘓松饑民貸粟富民不得遂
火富人屋竄海中王文即訊坐謀叛公抗章辯獲
免是冬御史劉孜薦公粹學飭躬進無所求退無
所累實君子之儒不宜置之閑遠乞召供館閣之
職俾講學輔導必有裨益上曰內閣本朕簡任
非人所得薦不許四年秋召爲大理卿裕陵復位

以禮部右侍郎兼翰林學士入內閣居數月轉左
會欲遣使徵獅西番公持不可不聽又曹石專用
事遂引疾致仕去四方從學者日衆公學貴踐履
不務論說辭受取與必揆諸義出處大節光明峻
潔於富貴利達泊如也接人無大小衆寡待之以
誠其言平易簡切不爲穿鑿奇僻之說晚年造詣
高明踐履篤實益至純熟著讀書錄二十卷嘗曰
自朱子後性理已明不必復著書程明道許魯齋
未嘗著作而言道統者必歸焉天順八年卒年七
十三謚文清劉文安公嘗請公從祀孔廟言公直

躬慕古談道淑徒進無附麗退不慕懋勤學好問
可謂文矣歸潔其身可謂清矣若論其於道所得
以比朱子諸徒若黃幹輔廣之親承微言金履祥
許謙之推衍緒說未知可伯仲否至斥建言者爲
非愚則謬過矣言官屢乞進公從祀先師廟庭不
果嘉靖二十三年令春秋專祀於鄉

侍郎呂文懿公

公名原字逢原秀水人正統七年進士公質性渾
厚貌容端偉未冠已讀書博洽能出入經史父景
州學官歿不能歸喪或勸公火葬公痛哭不肯從

權厝景州時時至墓慟哭景人及道旁行聞者皆
酸惜已而奉母南歸家益貧攻苦力學知府黃懋
閑秀水學官文奇學官對曰此邑里中呂生文也
呂生貧不能補弟子貢學官致家塾教諸子懋輒
嘆郡中乃有文士如呂生遺草萊中者急召公見
公入見衣藍縷甚試之舉業文詞理皆勝問之經
書輒能默誦講析懋益驚異與之新衣謝不受會
理葺黌舍與之諸餘材木又謝不受懋曰生家貧
粥此且得善價又謝不能太守益大奇呂生當是
時太守得輒補學諸生懋即遣公入學是秋發解

浙江第一明年進士第二入翰林時選翰林講讀
官裴綸杜寧謝璉王玉江淵陳文李紹商輅劉俊
及公十人習制誥於東閣十四年罷景泰中倪謙
及公初教小內官黃賜等七人書于文華殿東廡
上 一日至廡中命二人講倪謙詩國風公講書
堯典 上悅問二人官謙對臣左中允兼翰林侍
講公對中允右兼侍講 上又問中允講讀官品
二人對曰皆正六品 上曰品同安得相兼令左
右取官制再三覽顧二人曰進汝二人講讀學士
兼中允二人頓首謝他日 上再至二人遷坐旁

壁下 上曰何踟躕乃爾二人頓首對 君父嘗

臨坐臣子避不敢當 上喜二人敬慎後至館輒

立語或東西行不復坐天順初改通政左叅議仍

兼侍講入內閣尋陞翰林學士石曹寵用事知敬

公公朝會衣青袍亨笑曰行爲先生易緋公不答

未幾岳公正暨公列上石曹罪狀 上留中不發

曹石微覺 上意大恐遂共謀摘承天門灾詔中

語謂內閣臣訕 上上大怒坐便殿召對近臣厲

聲曰正大膽固敢爾原素謹厚左右正何也岳旣

去公得畱公與李賢同在內閣李公通達見事立

斷公守正謹恪稍濟之持重修

大明一統志公

克總裁母憂去道景州啓父喪歸合葬或以陰陽
五行家說沮公不聽奉載舟中寢苦枕塊極哀毀
竟病抵家尋卒贈禮部左侍郎謚文懿公在內閣
六年端潔不苟取予性儉約身無紕綺篋中惟賜
衣幾襲輒分祿贍宗姻貧匱者清心寡慾稠第無
隱過至老勤學晨夕不少輟子憲廕試中書舍人
舉順天鄉試歷官南太常卿有學行

論曰胡公端諒持正好直言薛公剛毅沉潜聖學
並不見容於時呂公溫恭潔約與人無忤竟以憂

去卒士君子際時遇主尚不究於用惜哉

皇明名臣記第九卷終

子履準校正

皇明名臣記第十卷

吾學編第三十一

海鹽鄭曉

榮國姚恭靖公

公名廣孝長洲人幼名天僖父欲公學醫曰兒不
樂爲醫願學諸生求仕否則從佛學至正間削髮
爲僧里中妙智庵名衍字斯道已又不學佛顧好
讀兵書尚謀畧燕爲詩學書嘗遇異人授占術輒
爲人決休咎與王賓高啓輩善厚亦與宋濂蘇伯
衡來往徧遊江湖洪武四年詔取高僧會病免八
年詔僧通儒者與官禮部試不得官賜僧服還山

十五年僧宗泐薦公因往來南京成祖將之北
平乘閒請曰殿下骨相非常英武冠世今皇圖草
昧東宮仁柔願厚自愛殿下試乞臣府中必有以
報殿下成祖已稔知公意亦欲得公已而十王
之國會高皇后崩上曰王與一名僧誦經念
佛修齋公名在燕府籍中大喜至北平居故慶壽
寺公每夢與劉秉忠語成祖時召入便殿密議
或嘆息泣下公曰天之所興誰能廢之願厚自愛
靖難兵初起暴風雨成祖意不說問公對曰飛
龍在天從以風雨元吉兵南行公送道旁言江南

有方孝孺者學行負盛名即不肯降幸勿殺當是
時獻陵居守公及郭資等日夜守禦輯拊兵民南
兵再攻城設伏截其後城上呼噪伏發急開門夾
擊大敗南兵去又夜緹死士下城劫南兵或遣數
十人遠伏草莽間夜舉火鳴砲詭南兵不得休息
輒出精兵奮擊敗之盡焚九門諸柵寨 成祖軍
中有聞見異事及兵進止輒緘書飛騎問公條答
附去並中機適靖難後爲左善世立東宮陞太子
少師復姚姓賜名廣孝輔太子南京 上令公蓄
髮再三終不肯從命嘗賜兩宮人逾月不近亦不

辭上乃召還兩宮人永樂二年賑濟蘇湖十六年來朝北京寓慶壽寺病車駕再臨視卒贈少師贈榮國公謚恭靖上爲文神道碑洪熙元年侑享成祖廟庭嘉靖九年移祀大興隆寺羅侑享

尚書宋公

公名禮字大本永寧人洪武中太學生爲山西按察僉事坐事左遷戶部主事謫戍寧夏建文初薦授陝西僉事辛巳又坐事除刑部員外郎靖難後命署禮部事俄陞禮部右侍郎逾月轉左永樂二年尚書工部或曰公爲陝西布政使召入工部爲

尚書時營北京公取材川蜀七年卒憂伐山通道
深入險阻時下勅嘉公勞蹟九年治漕河已又入
蜀十二年九載考績十六年來朝又入蜀是歲理
獄江西十七年又入蜀是年病召還京理部事造
番舟十九年造黃舟是年又入蜀公初治漕河濟
寧與侍郎金純都督周長修復會通河置十五閘
盡用濟寧同知潘叔正策役夫三十萬工十旬獨
租一百十萬石沒黃河故道用侍郎張信晷策與
典安伯徐亨侍郎蔣廷璿自祥符魚王口至中濬
下二十餘里殺水勢河成賞功公第一長以徇私

虐人不得賞又於寧陽築堤城壩遏汶水盡入漕
河用御史許堪策疏洩衛河至海豐大古河入凡
四百五十七里役夫三千工一旬自是挽漕京師
罷海運公功最大卒之日家無餘貲洪熙元年呂
震言公卹典未備與葬祭正德七年始賜祠祀會
通河上公剛果質直有經濟才馭下稍嚴以故事
亦易集純泗州人洪武中太學生爲文選郎中江
西叅政召爲刑部侍郎扈駕北征歷禮工刑三部
尚書太子賓客所至有政績淮泗間治水功最著
卒贈山陽伯純寬和有容吏事幹敏宣德二年夏

暑勅法司疏獄純數會客宴飲言官論純淹囚頌
繫錦衣獄 上念純老臣與致仕去純在刑部獻

陵嘗諭純及臺寺劉觀虞譙曰法司尚羅織言及
國事輒論誹謗甚無謂自今諸告誹謗者悉勿治
又嘗曰朕或嫉惡過甚處法失中卿等須執正長
天長人有膂力善騎射從靖難白溝東昌藁城戰
有功歷官督府治漕河卒贈萊陽伯謚忠毅又有
蘭芳者夏人讀書通古今洪武中舉孝廉爲刑部
郎官知吉安府有惠政民思之坐事謫爲辦事吏
從治河濟寧復爲工部主事永樂十年以公薦陞

工部右侍郎清潔無私

湯陰伯郭忠襄公

公名資字存性武安人洪武十八年進士爲戶科庶吉士試主事戶部總部歷改湖廣陝西司爲真曉練錢穀陞僉都御史尚書郁新薦改北平叅議上言弊政陞叅政不數月進布政使靖難兵起公獻策防禦已而留侍獻陵居守李景隆攻北平晝夜扞備輯睦兵民轉給饋餉盡心瘁力不畏強禦靖難後陞戶部尚書上曰資朕蕭何也未開月出掌北平布政司事即建北京置行部與雜僉並

改行部尚書深見信用永樂十九年罷行部復爲
戶部尚書時巡狩營建百費並興皆公調度獻陵
即位念公舊勞荐有寵賚立東宮兼太子賓客陞
太子太師以足疾賜勅給半俸致仕復其家宣德
三年夏公輟部務明年召公以太子太師掌戶部
事免朝叅公益恭慎祁寒暑雨必入署視事不少
休卒年七十二贈湯陰伯謚忠襄官其子佑戶部
主事公受眷三朝屢登八座衣食僅充樂不能莖
永樂後文臣贈伯四人金純山陽伯吳中荏平伯
金濂沐陽伯

少師金忠襄公

公名忠鄞人少慷慨負義氣兄戍通州公省兄會靖難兵起布衣田冠上謁典儀云浙東奇士金忠願見殿下說兵事及中朝動靜得召見公言殿下太平皇帝小人耕江海間及來往齊魯道上聞殿下賢譽服人心久矣茲舉大事人材爲急成祖說立授署紀善日侍帷幄贊理戎務尋陞署長史已爲真靖難後陞工部右侍郎治事北京永樂二年召入兵部爲尚書公博覽史籍議論河懸儲位未定上密問公歷數古昔適逢故事對上

喜賜公大鑲又曰詹事宮端汝以尚書兼詹事幸
善調護佐太子公侍監國時時勸起孝敬篤友愛
小心敬慎無失禮毀譽禍福聽諸天日而已或諧
謗廷臣及宮寮過者上密令公察審公退每數
日頓首再三爲白無此事願陛下寬宥上或不
喜即又頓首言臣敢保其無他他日有踪跡即如
人言臣甘連坐以故諸所全護者多公謹厚不洩
人亦不知也公每導人寬愛無爲苛刻公事輒推
同官使展其才能有關誤引爲已過不遺片善不
念舊惡俸賜有餘周賑鄉族太子即位念公贈少

師謚忠襄以其子達爲翰林檢討達幼遭艱棄
學支俸讀書比長景陵召達還翰林正統十二年
改禮科給事中陞都給事中景泰二年出爲長蘆
運使

太子少師儀文簡公

公名智高密人洪武中薦爲教官知高郵州高郵
人皆愛公曰知州長者陞知寶慶府寶慶人健悍
又畏敬公曰太守不可犯永樂二年遷東宮官陞
通政兼右中允未幾陞湖廣布政使三年入侍郎
禮部十一年元旦日食呂尚書請賀如常公獨爭

議不可 上令吏部翰林院擇一老儒侍太孫明

日太子召問得人未塞公及西楊薦公又曰人鮮
知智者以故議未決太子曰吾嘗舉李繼昂大誤
悔無及如智誠端士然老矣西楊稱智起家學官
明理守正精神未衰廷臣中老成正大無踰智者
是日午朝 上顧太子問曰侍太孫講讀得人未
太子應曰舉禮部侍郎儀智議尚未決 上喜曰
得人得人智雖老能直言元旦日食智執議免賀
智可用公寬平嚴正務持大體尚忠厚遇事是非
又輒別白爲太孫陳說不屑附會年八十致仕

銘字子新學于吳訥天性易直孝友舉經明行修
洪熙時爲行在禮科給事中贈父太子少師謚文
簡銘內府教書歷編修侍講正統中爲郕王長史
景帝初出南京爲禮部侍郎以立懷獻太子故
加太子太保未幾召爲兵部尚書尋掌詹事府事
卒贈太師謚忠襄

尚書郭公

公名璉北圻新安人初名進太學生永樂中爲戶
部郎官上知進進仕早未遑問學天資質直寬
厚臨事從容不見喜怒精練吏事簡約有條宣德

初爲行在吏部左侍郎兼少詹事 上爲改名璉

四年代蹇忠定公爲行在吏部尚書罷兼職五年

冬 上諭曰朕以用人之柄付卿卿宜爲朕擇才

昨郡守多缺命廷臣薦舉古人當斯任者必勤於

咨訪有得即錄故官不乏才呂蒙正夾袋虞允文

材館錄是也慎留意正統元年除公尺籍時進士

李賢入選公試賢嘉禾詩奇賢輔相材授驗封主

事未幾旱蝗侍臣言大臣尸位妨賢內批令自陳

諸大臣遂皆乞去謝天譴公獨不可曰 主上冲

年吾輩皆先朝簡任受付托一時請去誰與共理

宜引罪乞改過璉老矣官至冢宰豈敢貪位顧君
臣恩義如此衆是公言䟽上盡留諸大臣七年請
老先是宣德初內閣謂用人之柄不宜專在吏部
令三品以上京官薦用方面風憲郡守至公入吏
部又令五品以上京官薦用御史知縣人多嗜進
覓薦至行金錢相請乞言官論奏僅罷五品薦舉
公秉銓十四年名不及蹇公然潔庶務採實行不
用浮薄游聲譽之士雖爲內閣所侵能堅忍持正
自行其志

知府況公

公名鍾字伯律靖安人初以吏員事禮部呂尚書
震尚書薦其才永樂十三年授禮部主事二十一年
陞郎中初令五品上京官得薦士公薦右中允
張宗璉上召問西楊曰人皆薦下僚鍾乃薦朕
官臣耶對曰臣與王直擬薦宗璉不意爲鍾所先
上喜曰鍾能知宗璉即日陞宗璉大理寺丞宣
德五年擇郡守九人公知蘇州府賜勅乘傳之任
公初至郡佯不解事諸吏抱案環立請判公顧左
右問吏吏所欲行止公輒聽吏吏大喜謂太守愚
越三日公召諸吏詰曰某事宜行若顧止我某事

宜止若顧欲我行縛諸吏拷掠投庭下輒死者數
人諸吏又皆大懼謂太守神明公乃盡覈屬吏斥
貪墨者五人庸懦者十餘人八年夏旱旣發預備
糧賑農俾得盡力於田畝復與周文襄公講究收
糧法由永樂間轉輸北京餉道遼遠糧長以一徵
三府二百七十萬石加徵至八百一十萬除正供
及僦車船費盡爲糧長乾沒議別立糧頭同收受
互覺察除免舊徵三之一以其二之一爲轉輸費
餘皆入濟農倉爲來年經費本是年馬草米數十
萬石及九年夏稅折布絲數十萬斤絹數十萬疋

小麥數十萬石及雜出供費並代以餘米上無逋
事下無橫科民大悅每旱又輒發此餘米賑活輒
數萬人二十餘年積弊不戮一人而盡除民接邇
終歲在官不得負貶公敘丁差歲不過三日盡罷
其在官者置綱運簿防運夫侵盜又置館夫簿防
非禮需索綜理周密簡約易行大抵公爲守專厲
豪狡拊善良勢家恣犯法立死杖下吏民大驚奉
約束寒門下士有行藝者時時賑贍諸儒生喜爲
流聲舉爭獻詩頌美有鄒亮者獻詩公稱賞欲薦
于朝會有以匿名書數亮過失揭府門者公得書

笑曰彼欲沮吾薦正速成亮名耳遂奏亮才學可用召試授吏刑二部司務轉監察御史正統元年劾御史王璉罪狀法司論逮璉歲滿去民叩關乞留者八萬餘人陞公正三品仍知蘇州府七年卒市巷哭送其喪競立祠祀公公剛正奇偉潔廉之操一塵不滓操履之固千夫莫回令行秋霜靡暴弗馴惠流時雨靡倖弗煦國初蘇州知府有王興宗者與葉春並爲皂隸事孝陵上以二人老成不貪以春爲鸞儀司副使興宗爲金華知縣李丞相言興宗皂隸奈何爲令上曰興宗勤而不貪

又善處事儒與吏不及也何有於縣歷陞南昌通判高州知州懷慶知府會蕪乏守上令胡丞相擇人未及擬請上曰莫如興宗改守蕪州有善政陞河南布政使老歸又有魏觀蒲圻人博學有文名歷陞侍讀學士授太子諸王經遷祭酒謫知縣召爲主事乞歸旣平吳守者非人上思觀召守蘇州觀至防奸撫善賑貧禮賢條平役賦報政爲天下最陞四川參政難其代復還觀守蘇後以政府治於士誠故基及沒錦帆涇爲御史張度所劾上怒建觀及高啓王彝並坐死未幾上

又思觀賜葬祭

都御史羅公

公名通字

吉水人永樂十年進士授御史巡

四川有風節永樂十九年奉詔言事與六科官並
謫邊知州正統元年爲戶部員外郎理宣府邊餉
陞兵部郎中三年從尚書王驥甘肅征阿台朵兒
只怕有功十四年冬虜報至公守居庸關給事中
孫祥守紫荆關廷議並授僉都御史時景帝初
即位面諭吏部誤云副都御史二人竟得爲副都
御史公守關有方略才警敏擒虜酋那言帖木兒

提精兵五千南襲虜至拘羊山斬捕虜有功召入
叅贊軍務理院事景泰元年給事中言公本河泊
所官以內閣陳循薦其曉暢兵法尋陞副臺叅昌
平侯軍務今更兼院事妨誤戎機不便是年公疏
乞勅石亨楊洪各率精銳馬步官軍亨自紫荆出
大同洪自居庸出宣府沿途巡哨提督官軍堵塞
關口修理牆柵勦除賊寇防護耕種公又言邊軍
妄報首功虛張虜勢德勝之戰近在都門斬虜幾
何陞六萬六千有餘又言腰玉珥貂者皆苟全性
命思能憎言于公譙不喜上言德勝當先一萬九

千八百八十人陞一級陣亡三千一百一十八人陞二級餘皆給賞且乞罷兵柄六府部院翰林科道議乞留于公亦言通志在滅賊爲國計無他謙等宜同心協力勿互猜嫌是年公乞下令擒斬也先伯顏帖木兒喜寧者賞萬金封公侯于公上言口外軍民連歲被兵不能種藝恐虜寇野無所掠擁衆以迭駕爲名突至太原則山西搖動而河南淮甸之間亦可憂矣宜選有謀略文職大臣往鎮山西上以命公時昌平戾乞差文武大臣率兵出鴈門用鹿角擡營護山西餽運大同兵部請命

公公意不欲行疏言于譙楊洪建此策乞令與臣
同行奏下于公疏曰當國家多事之秋非臣子辭
勞之日臣譙諳熟山西事情譙宜去上仍令公
往三年冬公言虜恃馬力出入塞下今也先使臣
有馬四萬宜增價酬之價重則馬益至不數年胡
馬自空此坐弱強虜之策也是年督兵逐虜懷來
至長安嶺又斬首有功能門鵬鶚諸城殘破守將
撤兵內徙遺芻糧數萬公上言虜來有鄉導欲奪
芻糧守則軍力不足運則民財不足焚則國用不
足乞廷議戶部尚書金濂奏下公及總餉侍郎劉

璉總兵朱謙共計上巳而虜退公請班師還京協
贊軍務四年上將傳要畧命以訓練將士是秋與
蕭維禎並陞左右都御史天順二年致仕弘治十
八年隆慶父老奏已巳之變通守關有保障功勅
祠居庸關

太子太保陳儋敏公

公名鑑字有戒吳人永樂十年進士爲御史陞按
察副使擢副都御史鎮陝西得便宜行事公慈厚
寬洪清慎悉民疾苦不作聲色專務安輯凡練兵
屯田水利鹽法事有經畫薦按察使王文副使金

濂入內臺正統元年與于公上疏請定輸粟贖罪
法在陝十餘年教興政理詎入朝民必遮道送不
忍舍比還歡迎父老或走數程久旱公至即雨雨
久公至必霽人益愛戴公召入臺爲右都御史與
王文共事正統景泰間文與公更出鎮陝西已而
文當代公入陝御史爲文上疏言文風采乞留內
臺朕清惠以侍郎出代公尋陞公左都御史太子
太保景泰四年秋致仕卒謚僖敏陝人尸祝焉

武功伯徐公

公名有貞字元武初名瑄字元玉吳人宣德八年

進士庶吉士授編修陞侍講已巳之變有薦公才者召問計泣曰驗之星象稽之歷數天命已去請幸南京避虜于謙力言不可遂止景帝即位勅十五人守要害屯兵爲京師援公權監察御史守彰德景泰四年秋公爲諭德兼侍講矣上言人臣避國諱子孫避家諱禮也臣幼誤犯祖諱禮當避請更名有貞是冬河決張秋石璞治之久無功集議文淵閣推公擢僉都御史治河公自北東徂南西踰濟汶沿衛及沁循河道濮范究源流度地行水上疏曰臣聞平水土要在知天時地利人事而

已蓋河自雍而豫出險之夷水勢既肆又由豫而
究土益踈水益肆沙灣之東所謂大洪口者適當
其衝于是決而奪濟汶入海之路以去諸水從之
而洩隄潰渠淤澇則溢旱則涸此漕途所由阻然
欲驟堙則潰者益潰淤者益淤今請先疏其水水
勢平乃治決決止乃濬淤多爲之方以時節宣俾
無溢涸必如是而後有成制曰可公往來展布經
營作治水開疏水渠渠起張秋金隄西南行九里
至濮陽濬又九里至博陵陂又六里至壽張沙河
又八里至東西影塘又十有五里至于白嶺灣又

三里至李峯由李峯而上又二十里至蓮花池又三十里至大渚潭乃踰范旣漢又上而西凡數百里經瀘淵以接河沁公曰河沁之水過則害微則利乃節其過而導其微平其水勢旣成渠名廣濟閘名通源渠有分合而閘有上下凡河流之旁出不順者則堰之堰有九長袤皆至萬丈九堰旣設其水遂不東衝沙灣乃更址出濟漕渠阿西野東曹南鄆址出沮洳而資灌溉者爲田百數十萬頃公又參綜古法就長擇善加神用焉爰作大堰其上捷以水門下捍以長隄堰崇三十有六尺厚什

之長百之闊廣三十有六丈厚倍之隄之厚如闊
崇如壩長倍之架濤截流柵木絡竹實之石而鍵
以鐵蓋合土木火金以平水性又導汶泗之源出
諸山漚澶濮之流納諸澤又濬漕渠由沙灣北至
臨清凡二百四十里南至濟寧凡二百一十里復
作放水閘于東昌龍灣魏灣凡八爲水之度其盈
過丈則洩皆通古河以入于海上制其源下放其
流旣節且宣用平水道初議者欲棄渠弗治而由
河沁及海以漕又欲出京軍疏河公因奏調瀕河
民馬牧庸役專力河防以省軍費紓民力工部請

如公言不中制以是得成功是役也聚而間役者
四萬五千人分而常役者萬三千人用木大小十
萬竹倍之鐵斤十有二萬錠三千緡八百釜二千
八百麻百萬斤荆倍之藁秸又倍之而用石若土
不可算然用糧于官僅五萬石爲日五百五十有
五君子曰元武之才微於是役也白渠漑而不漕
鄭渠漕而不貢工皆累年費萬萬計匏子不漑不
漕又不以貢久役勞人至勤萬乘獻璧馬額神視
張秋輕重難易何如也七年陞副都御史還朝公
負文武材臨事敢爲有經畧乃與石亨善竟以奪

門功陞兵部尚書華蓋殿大學士封武功伯食祿千一百石世指揮使入內閣時內閣諸臣盡得罪死徙落籍去公得爲首相欲立功名自異稍與石總兵相左李賢旁助公凡用人行政稍持正左右已不能堪內臣曹吉祥亦以奪門功與國政不通文墨恐事歸司禮力贊上事須經內閣意籠絡內閣附已已而吉祥薦用私人內閣輒相阻吉祥固不悅天順元年御史楊瑄劾曹石曹石疑出公意見之盛氣乞逮御史初曹石爭寵利不相能至是遂合率上表哭訴曰內閣專權欲除奴輩伏

地哭不已又言奪門時出萬死立功今爲內閣所
陷遂下楊御史及都御史耿九疇公及賢詔獄即
日雷雹交作大風拔木承天門災二凶家大木皆
折冰雹雹不自安上遂釋賢謫公廣東叅政行
至德州會有投匿名書斥朝政者曹石以爲出公
復逮詔獄拷治無驗命取公誥券示三法司刑部
侍郎劉廣衡等遂劾公詐撰制文竊弄國柄自謂
治水希蹤神禹敢以定策冒貪天功大不敬無人
臣禮論斬上會災變得宥編置金齒四年冬上
坐文華殿諭賢王翺曰有貞才學亦難得當時有

何大罪爲石亨張軌所陷如後世議何可釋歸田
始得還鄉卒於家公短小精悍博學多能有膂力
天官地理兵法水利陰陽方術無不通貫文雄奇
詩亦道勁

少保馬恭襄公

公名昂字志高滄州人鄉舉入國子監授序班正
統二年薦陞監察御史整飭大同兵備八年刑部
失囚堂上官下獄陞公刑部右侍郎改副都御史
叅贊甘肅軍務勅都督王喜喜坐罪戍遼東守臣
貢駝馬赤斤蒙古罕東諸蕃掠夫公出戰擒大酋

鎮南奔景泰初病乞還朝勅致仕四年薦起總督
軍務代鹽山蕪巡撫兩廣擒僞將軍周鐵等三人
陞右都御史七年平斗峒賊轉左都御史天順元
年致仕入見復留命巡視山西還院二年陳汝言
坐贓下獄論死代爲兵部尚書五年虜寇陝西公
總督軍務與懷寧侯孫鏜西征師且出會曹欽反
與鏜擊賊賊誅加太子少保仍掌部事裕陵每召
公對詢將官短長用邊鎮巡撫亦令南陽鹽山與
公議公質直肯任事曉暢軍務選擢將校多得其
人茂陵即位改戶部尚書與都御史林聰簡十二

管軍公在戶部亦欲理財裕國用顧曲算闊狹會計非其所長功名損於兵部時四年御史以星變劾公公請致仕卒年七十八贈少保謚恭襄錄子忠國子生子恕錦衣世百戶

論曰成湯立賢無方有以哉姚公籌軍旅宋公成河渠况公條賦役金公處君臣父子兄弟間卒能調護猜嫌以終其身此其人豈易及哉儀公耆德有園綺之風郭公朴魯少文然能持正不繳繳與人競亦不失已羅公陳公皆有風節知兵曉吏事民思慕之馬公著功名于南北邊本兵亦不異其

鐵湯陰不能救張北平武功不能全于肅愍與廢
之際然乎

皇明名臣記第十卷終

子復準校正

皇明名臣記第十一卷

吾學編第三十二

海鹽鄭曉

太子少傅劉節愍公

公名儔江陵人洪武十八年進士爲兵部主事累陞左侍郎建文中爲侍中靖難後陞尚書公有材力縝密勤敏能出奇應變征交趾出叅軍有功還受賞永樂六年趾賊簡定反出叅沐晟軍敗生厥江被圍卒洪熙元年贈太子少傅謚節愍時都督僉事呂毅陷陣死交趾叅政劉昱亦死毅項城人百戶從靖難陞督僉送陳天平至鷄陵關敗宥罪

從征充鷹揚將軍掌交趾都司事沉勇有智畧号
武陵人嚴猛有吏才

少保陳節愍公

公名洽武進人淹貫經史謹敏有才識洪武中薦
布衣善書授兵科給事中憂去建文中起復文選
郎中靖難後陞右侍郎轉左改大理卿討交趾出
叅軍兼給餉交趾平覈將士功罪建授土官經理
兵食分守隘寨剖決如流皆中節適陞吏部左侍
郎是時黃尚書兼掌布按兩司事寬大專意撫輯
公甄拔才能振以風紀交人悅服還朝陞兵部尚

書鎮交趾仍叅軍事洪熙元年召黃尚書還公代
兼兩司事仍叅軍事未幾內官馬騏苛斂暴交人
再叛攻交州城敗賊去王通復引兵渡河擊賊戰
寧橋公力陳利害言賊狡有伏誘我不可出通不
聽遇賊公奮身力戰不支被賊執不屈罵賊死事
聞上曰大臣以忠徇國一代幾人贈少保謚節
愍官其子樞刑科給事中時交趾布政使弋謙上
言乞褒死節贈都指揮李任都督同知指揮使顧
福劉順徐騏皆都指揮同知指揮僉事劉安指揮
同知正千戶蔡顥指揮僉事副千戶桂勝正千戶

知府諒江劉子輔諒山易先布政司叅政政平知
州何忠府同知內官馮智太監並復其家任金華
人襲文官靖難有功交賊獲都督蔡福福至昌江
城呼任等降任罵福叛君賊狗彘不如與顧福等
且守且戰前後三十餘戰輒破賊賊益兵衆攻九
閱月糧盡衆困賊雲梯登城奪其門任復率死士
三戰三敗賊賊擁兵衆大進不能支任福皆自刎
死智順自縊死城中人不肯降死者數千人子輔
廬陵人以太學生爲御史持身謹行儉約如布衣
用法公平不見喜怒巡浙江有風裁陞廣東按察

使坐累左遷守諒江撫民如子民亦愛戴子輔賊
攻城勢猖獗旁郡縣皆陷子輔獨效死守援久不
至食盡城破城中兵民盡鬪死不肯降子輔曰郡
亡我亡義不污賊自縊死一子一妾皆先死何忠
江陵人進士爲御史持正永樂十九年三殿災言
事出知政平州明敏有吏才居州廉慈忠計事上
藩司會寧橋軍敗賊乘勝逼城成山侯詭與賊和
且請赦朝廷賊遣酋陳渭老表謝密令忠勝同渭
老行請益兵征勦至昌江內使徐訓泄其謀賊拘
忠等欲降忠忠不聽刀鋸臨忠不降且鋸忠忠益

大罵賊勝亦不屈忠父子及勝同日死麟與頤守
立溫賊攻城糧盡猶率罷卒固守城陷無一人降
者賊屠城麟頤皆自縊死易先湘陰人國子生爲
知府諒山有善政任滿當還交人乞留進三品祿
賜諒山城陷自縊死劉安征交趾功留官交趾前
衛守備又安將還保東關至富良江遇賊被執安
密與衆謀候討賊兵至內應千戶包宣以告賊賊
將殺安安與指揮陳麟奮起奪賊刀殺數人自刎
都督蔡福都指揮朱廣薛聚于瓚指揮魯貴千戶
李忠皆伏誅福鎮守又安不與賊戰率廣等降賊

又賊造攻具破東關時有官軍九千餘人發憤
欲劫焚賊營福又遣百戶牟英告賊賊盡殺九千
餘人遂攻破昌江等城又輒至各城說降至清化
知州羅通罵福反賊宣德三年黎利歸福等京師
盡棄市籍其家又有馮貴侯保爲交趾左右叅政
討賊力戰死景陵即位贈二人左右布政使

太傅曹文忠公

公名瑄字
寧晉人疏俊明偉內剛外和練達
國契才量出人初鄉舉署代州訓導非其好也願
得一劇官自效敗秦和典史益肆力問學嘗督工

匠入京自陳願就禮部試宣德八年進士第一授翰林修撰正統五年陞侍講九年陞翰林學士十一年入內閣與政典制文詞宏潤日講音旨清暢尋陞吏部左侍郎兼學士是時東楊卒凡議大政諸閣老推決於公公才明敏類東楊視中官王振正色不少假振益憚公十四年沒土木贈太傅文淵閣大學士謚文襄改謚文忠賜衣冠葬官其孫榮錦衣世百戶

少保鄭忠肅公

公名瑩字孟質宜章人永樂辛卯鄉貢士理刑都

察院以廉平名十一年爲監察御史時駕在北京
有言南京鈔法滯衆謂將起大獄公往擒市豪一
二歸奏曰市人聞令懼鈔法通矣事遂已十六年
石州人告變擢陝西按察副使勅公事即實會官
軍勦公察其誣乃反獄亡命妄言冀脫死聞上止
弗問誅誣者宣德四年陝右饑移粟煮粥全活人
公最清謹父又賢嘗市褐寄父父貽書罵何處得
此褐者以不義污我父教官公欲見父聘陝西考
鄉試父又大怒罵辭不至歸憂服除陞應天尹興
利去害市征田稅皆酌其平豪猾不得爲輕重正

統元年進兵部左侍郎時尚書王驥西征公任部
事有勞上與除戎籍四年京師淫雨壞廬舍公
言此陰陽爲沴兵陰也臣等不職所致乞罷歸田
里不許乂之進尚書時欲變易軍伍使南北人各
適土性下群議公曰此舊制不可紊稍有變易將
不勝其弊咎將誰歸卒不動十四年上北征虜
力止不允比出關又請回鑾王振惡公矯旨令與
戶部王尚書佐隨老營至懷安墜馬幾殆從者請
留就醫藥曰天子在前可託疾求自便力疾至雲
中還至宣府虜大至公再上章請疾驅入關而嚴

兵爲殿皆不報最後詣行殿力請振怒曰腐儒安知兵事再妄言必死公曰我爲社稷生靈言何得以死懼我振愈怒叱左右扶出明日次土木師覆遇害贈少保謚忠肅佐海豐人永樂中貢士爲給事中正統初陞戶部侍郎六年陞尚書十二年兼吏部事佐狀貌魁梧器宇深厚政有體要心無苛隘耻不若人晚嗜學問贈少保謚忠簡

論曰劉陳曹鄭南征北伐倉卒遇賊非所謂以死勤事者耶劉陳宣力邀微從事獨賢始焉共命終焉效死可無憾也曹平章有密鄭與司戎政不能

力爭於朝卒致萬乘蒙塵捐軀草野悔無及矣

皇明名臣記第十一卷終

子漢準校正

皇明名臣記第十二卷

吾學編第三十三

海鹽鄭曉

侍郎段公

公名民字時舉武進人永樂二年進士庶吉士與修永樂大典除刑部主事又與修五經四書性理大全進員外郎郎中永樂十八年妖賊唐賽兒反山東十九年冬陞山東左叅政討平之廷議擇守臣當是時索賽兒急盡逮山東北京凡既又盡逮天下出家婦女先後幾萬人公撫定綏輯曲爲解羣人備始末善爲從違請勅奉轉飭舟自濟寧至

通州俄又令陸轉居庸關出塞公節約曲算省財
力民不擾事集道中忽降勅令公與巡按御史考
所過郡縣吏宣德二年召考會試禮部三年召入
戶部爲右侍郎淵剔奸垢出納清允尋改刑部特
賜勅公廉介端謹令考察在京百司先是榜例越
訴者杖百謫戍邊公請罪如律九年卒官貧不能
喪吳文恪公力爲經紀始克殮成化間葉文莊公
請褒公不果公好古力學精練吏事廉平勁直人
莫敢干以私

都御史顧公

公名佐字

太康人建文二年進士爲知縣莊

浪拜御史巡廣西採木四川防守邊陲陞西按

察副使再陞應天府尹尋以營建冗棘改順天公

歷兩京尹剛毅不撓貴戚豪勳斂戢永樂十九年

貴州有夷警改按察使貴州或曰勲戚家不利公

以故相排擯去獻陵素知公庶幾召爲通政使宣

德三年臣僚奢縱御史多濫貪不法都御史劉觀

被斥上問東西楊廷臣孰可掌憲者二人未即

對上曰未必乏人至此西楊言通政使顧佐歷

內外臺有風采東楊亦信佐尹東廠廉公事嘉四

佐乃能如此。雖有副都御史與憲。蓋國都察院。則
廷耳目。國家綱紀。用得其人。則庶政清平。群僚警
肅。否則百職怠弛。小人橫恣。近年在京諸司。奸弊
紛出。司風憲者。不能糾舉。且與和同。圖何賴焉。爾
佐剛直廉正。簡在朕心。特畀斯任。其竭誠盡力。恪
恭夙夜。毋憚勤勞。彈劾愆謬。毋避權要。毋枉良善。
毋縱姦宄。各遵御史。卽宜審擇。凡廉勤公正老成
醇厚者。留用不達政體貪滯無耻及曾犯贓罪者。
送吏部降黜。公差給假丁憂者。亦如之。御史缺行
吏部慎選。不得濫授。欽哉。公遂考覈御史貪滯不

律嚴暲等二十人謫吏遼東不達政體李孟宣等
九人降典史老疾馮斌等三人爲民五年暲潛入
京造詞脅人公又劾暲踪跡詭秘且欲殺臣上
誅暲西市陞右都御史奸吏犯科者摺奏公受隸
金私遣歸上以公臺端不欲發其過密示西楊
且曰爾不舉佐庶乎西楊閱奏謝曰事有之顧中
朝官祿薄僕馬薪芻咸資之隸遣隸隸得歸耕官
得資費中朝官皆然臣亦然蓋自永樂至於今
先帝固知之以故增中朝官俸上怒曰朕方擇
佐用小人輒誣佐必下法司治對曰末事不足干

王 怒請付佐治恩法並行矣 上召參議吏狀

且諭曰此不足爲卿累小人不樂卿檢制敢誣正

人汝自治之公頓首謝公呼吏至言 上命我治

汝汝宜改行吾且貸汝 上聞之益喜數月又有

囚告公以淹不理 上又怒召西楊諭曰此必死

囚教之欲中傷佐立命三法司會鞠實出千戶臧

清清殺無罪家三人奏當死繫獄 上曰不誅清

佐安能行法立命磔清西市是年在告行在兵部

右侍郎王驥署院事時 上數郊巡必勅公及勲

臣居守八年又在告吏部尚書郭璉兼院事正統

元年開公尺籍二年公考察去御史邵宗宗九載

滿在吏部 上爲原宗詰公公請老勅戶部復公

家家居十餘年卒公性嚴重守正嫉邪人知敬憚以故竟擠之去公旦晚小憇外廬立呵藤戶外官條行道者輒引避入內直廬獨處小夾室非議政不與諸司群坐先是有師達者東阿人長陵北巡

嘗問 太子南京群臣孰廉 太子對曰皆廉

上曰從朕北來者率好貨惟吏部侍郎師達一人廉耳達起太學生歷御史按察使堅貞有風裁靖難後陞兵部右侍郎改吏部領行在吏部事征胡

總軍餉陞南京戶部尚書兼領吏部達孝行純至
操履端潔又有進賢向珪洪武十八年進士歷職
方員外郎九年滿陞通政使不能奏對自陳改應
天尹建文中坐累謫廣西靖難後復府尹坐繫獄
數年左遷運司判官獻陵知其廉直召爲副都御
史兼詹事宣德初蒞南臺致仕珪有文學屢經窮
阨介節不渝蔬食水飲布衣泊如也

尚書耿清惠公

公名九疇字禹範廬氏人永樂二十二年進士宣
德六年爲禮科給事中議論持大體有清譽正統

二年兩淮鹽法大弊擢運司同知公性節儉嚴肅尤慎交接無毫髮私吏胥豪商勢家稟稟不敢肆嘗條奏鹽法便宜事著令內艱鹽場數千人走闕下乞留陞都轉運使嘗坐水旁童子曰水清不若使君清已而被誣逮下獄得釋又以都御史清理兩淮鹽法景帝初陞刑部右侍郎屢辯疑獄勢利不能怵有婦訟其夫坐離異公不可杖其婦歸夫尋出理兩淮鹽法已無江北寇撫歲凶盜起公善循拊流民復業者七萬家勅錄諸郡大辟囚寃得釋者二十六人有婦人來何苟家者去而死婦家

論薊興弟殺婦有誣服公疑釋有兄弟已而竟得
殺婦者讐家也代還京景泰三年王文當出陝西
鎮守代陳鑑文不欲行諷諸御史劾已公以侍郎
出陝西鎮守除弊屏貪廉望益著先是延撫多部
寺司堂上官文移不得輒下按察司不肯受約束
公奏得徑下邊將請增臨洮諸衛戍兵下公議言
邊城士卒不爲少將官能嚴紀律精練習勤撫恤
絕侵漁養銳氣一可當百加以賞罰明信人人自
奮不然徒冗食耳竟不增戍是秋勅公考察陝西
方面官四年冬陝西左布政使許資言侍郎鎮守

與御史不相攝文移輒礙改公右副都御史鎮守
會有旨市羊角爲上供燈公疏論曰昔宋神宗買
浙燈蘇軾諫止今買羊角製燈無乃類是書曰不
矜細行終累大德 上遂止天順元年公來自陝
西留爲右都御史勅公考察諸御史是年諸御史
勸曹石達詔獄并達公降江西右布政使尋轉四
川 上知公清正一日對輔臣論人才言九疇去
非其罪南陽對曰九疇操行誠不易得未幾以禮
部召至京陛見 上憐其老改南京刑部尚書曰
德卿養病四年卒 上又曰可惜此老以在壽卿

史道雖積代公公孝友純至居喪秉禮平生無飾嗜好公退焚香讀書而已交遊不泛請寄不至其門雖權貴亦敬憚不敢犯論事是非確然不肯諂隨好善嫉邪別白太過以故與衆寡合累遭讒困卒謫清惠子裕自有傳

尚書年恭定公

公名富字大有懷遠人本姓嚴籍訛爲年永樂中鄉貢爲山東德平訓導乞修定先師廟配享從祀封爵禮儀召爲吏科給事中糾正違失務存大體陞陝西參政巡歷郡邑察民隱革奸弊興學勸農

尤嫉賊吏正統九年陞河南布政使饑民流聚十數萬剽掠居民撫輯散解力行節儉却侈靡風俗爲之一變也先數侵邊陞左副都御史提督大同軍務舉廢政革科徵抑豪橫廣屯田民始有更生之望軍功爵賞必覈無濫襄垣王遜燁誣公公請老戶部言公庶威爲奸豪所忌不可許景帝爲勅王守法度勿得汙風憲大臣卒吳淮誣公不法謂侵郭總兵坐總兵上于譙上議曰穰苴布衣監莊賈軍以軍法誅賈卒破秦晉齊以一穰苴故稱強剽國裴度

中丞

督淮西

諸大帥

平蔡

我朝

近日左都御史王翱右僉都御史鄒來學皆坐總兵上以軍令出翱等淮妄言沮軍法宜究主者事遂寢公又嘗按山西叅政林厚坐厚法厚亦誣公臺置獄訊景帝曰厚怨富富執法公庶誣富得自便朕以邊事付富終不以一人言辱富厚竟削籍公又按分守內臣韋力轉貪虐力轉誣公廵按御史爲雪公誣狀事得已天順初石彪倚亨中公危法逮詔獄上素知公南陽又力爲解得致仕未幾南陽薦賈銓爲戶部尚書召銓至又薦公左右不悅公者輒巧譖沮公上諭南陽戶部非年

富不可對曰人多不喜富 上曰富執法宜司國
計竟召公爲戶部尚書時王忠肅公年七十八
上又諭南陽曰繼翺吏部非富不可公經理財賦
蒞以勤廉不動聲色出納節適八年春陝西用兵
督餉非人屢乏軍興公薦楊璿余子俊吏部疏論
公侵官公上言薦賢爲國同心共濟若事輒任已
動率尤人恐乖推讓之風自失寅恭之義且乞致
仕不許公剛正朴忠簡言寡慾遇事直前不顧利
害氣節才識世不易得卒年七十謚恭定

都御史軒公

公名觀字惟行鹿邑人永樂二十二年進士天性
廉介進士督漕淮上嚴冬忽墮水援出裹被坐有
司急進衣却去竟俟舊衣乾除行人司副陞監察
御史正統元年與御史十六人出清理軍政清修
苦節嚴明不苟人畏服之陞浙江按察使前使奢
汰不檢公矯以清約禁絕和買四時一布袍蔬食
不厭約諸僚三日出俸易肉一斤多不能堪故舊
經過輒留飯飯惟一肉或至殺鷄見者皆驚異曰
軒庶使殺鷄爲客大破費遭喪卽行僚屬尚未及
知時守浙阮監丞隨亦清謹安靖與公善公旣去

陳璇代公亦清嚴浙臬稱治景泰四年公爲副都御史巡撫浙江改南臺內艱奔喪天順初首用公爲刑部尚書耿公爲右都御史二人庶介有名海內信向未棄耿公欲去石亨太果反爲亨逐去公亦病請致仕上召公至文華殿面諭留視公疾不可強與致仕陞辭上復問公曰昔浙江廉使考滿歸家僅二竹籠是汝乎公頓首謝又問卿年未老病愈再可用乎公又頓首辭疾上賜金爲道路費公去上復思公召爲左都御史督南京糧儲公嚴教遇人無賢否悉峻拒不與接歲時詣

禮部拜表慶賀屏居一室撤燭朝服端坐寂無一言鼓嚴出行禮禮畢竟御肩輿歸僚儕聞公來輒避去不樂與公處南武庫郎沈琮嘗言留都大臣惟公及魏驥庶平峻偉不務文飾間令吏寫公牘數十冊卒後修史有司從其家取行實無有也公前有南海周新者永樂中爲浙江按察使廉梗有威爲錦衣紀綱中傷死獻陵母悼惜之人稱新爲冷面寒鐵公

都御史魯公

公名穆字希文天台人

年進士爲監察

御史執法不撓獻陵監國時列上漢庶人不法罪
狀留中陞福建按察僉事理冤濫懲貪墨摧豪強
直介孤立行一意不可干以私泉州人有李姓者
妻吳美舊與富烟林私李調官廣西林令二僮從
李行殺李道中并殺其姪吳竟適林李宗人訴之
郡郡得賂反坐李宗人誣又訴按察司司得賂如
郡十餘年未決公故庶得踪跡甚詳一訊林即服
漳富人許初無子後兄子已而妾有子與兄子貴
三之一托已子許死兄子言妾子非許子也遂去
盡奪其貴公大召縣中父老及許宗人詢之皆曰

妻子本許種也。兄子始服罪，超陞金都御史，召入臺。正統七年，巡視應天府。公幼舉動異常，兄稍長，攻苦食淡，力學博經史，嘗大書座右，咬得菜根，百事可做。比入官，請寄不行，問遺並絕。義色正，詞清心寡慾，蒞政臨民，外嚴內恕，決疑應變，才氣雄敏。歷官中外三十餘年，家無餘貲，沒不能歛。公卿贈賻，僅足棺衾。國初有薛祥，無爲州人，佐孝陵開國，有功，歷陞工部尚書，頗以怨言聞，下獄死。家徙瓊州。孫遠進士，授戶部主事。天順初，使交南，還陞右侍郎。母憂去，起復爲工部侍郎，治河河南，尋鑿揚。

州河四十里成化初兵討兩廣叛獠改戶部調兵
食諭衆能破賊者即有其輜重人人奮勇師至大
藤峽賊平陞左侍郎三年進尚書總督京儲六年
行視漕河十三年致仕又明年起爲南京兵部尚
書叅贊機務十六年致仕弘治八年卒年八十三
遠於禮樂兵刑天官律曆無不涉獵尤熟國朝典
故在戶部最久文移奏劄悉出其手改定戶部事
例芟繁正訛均節委積內外遠近多寡輕重咸有
品式會校出納吏胥拱手時中外競陳利害始一
人以爲可行而行又一人以爲可罷而罷公一切

弗聽遠居官四十年家無長物食無蕪味室無腰
妾曰少吾事親恒不足今安忍有餘

尚書林恭肅公

公名鶚字一鶚浙太平人景泰二年進士初爲御
史時言官得志輒妄言摭撫中傷人益交結橫甚
公獨持大體略細故嘗監試禮部內閣陳王子不
得舉誣考官劉文介公又以公邑子林挺得舉誣
公私挺逮挺考訊且并逐公及校挺文文固有辭
理事得白裕陵復位盡左遷諸言事瑣猥狹勢鴟
張者簡諸守正持大體者爲大郡知府公知鎮江

比辭召見賜食褚幣諭擢用意公至郡汲汲興利除害不出一言暴前人短鎮江漕河孔道往經孟瀆險議鑿河自七里港引金山上流通丹陽避孟瀆公言迂遠多石又壞民廬墓請按京口閘甘露壩故迹稍深浚通舟春夏啓閘秋冬度壩道里近功力省又不損民壞地利甚便竟停役從公言未幾更劇治蘇州公一切簡靖即有建革必審覈再三吳人重公名旦夕責效頗笑守迂緩已而見其深思曲算曷久遠利即又稱林太守康濟才也超拜江西按察使平反冤獄必據律不肯輒重輕徇

上下意廣信有妖賊妄稱天神夏尚書等旁迹邑
盡驚疑公榜縛其魁事遂解否且用兵或起大獄
歷兩布政使歲餼奏減民田租十五萬石嶺南有
獠寇急調兵食捍境上寇不得入境成化六年陞
南刑部侍郎審訊刑獄必從容調劑僚屬間務適
情法內艱去服闋召刑部侍郎時年未五十譽望
出諸卿右衆冀公大用未幾卒官貧無以爲歛黃
文毅謝文肅二公經紀歸其喪公秉禮植義造次
必恭慎公餘輒危坐閱書史臨古帖作楷書寢必
夜半漏盡即起馭下稍嚴交遊不苟事母程淑人

極敬愛母不談跪請移時必母說乃起歷仕中外
二十六年家無益產篤行孝廉君子也嘉靖二十
二年御史趙大佑上公節行贈刑部尚書謚恭肅

都御史楊公

公名繼宗字承芳山西陽城人天順元年進士性
鯁直言動磊落初爲刑部主事獄中重囚數百久
桎梏多臭腐死公巡牢曰此曹罪皆死即未死亦
宜善視時與食飲櫛沐蘇活人無算會廷議擇郡
守王忠肅公薦知嘉興府公携一蒼頭書一篋署
中蕭然如旅舍興學勸士閔農賑災夙夜不懈民

有事至郡和顏曲問盡得郡中諸豪奸及良馴狀
與民所疾苦爲調劑興革有孔御史者挾威凌有
司杖殺人公榜通衢孔御史酷撻人至死者言府
孔御史見之即之旁郡去嘉興當江南孔道內臣
往來百方索賂公直與菱藕曆日內臣曰我無用
此太守幸與我金錢或好布絹公曰諾即出牒取
庫金云與太監市布絹即索金錢又出牒取庫金
錢入饋曰布絹金錢在也幸與印券附案他日磨
勘內臣咋舌不敢受公有大節持風裁藩臬御史
皆憚敬公公在郡誅鋤奸豪盡束手斂跡但得改

過即止不深究滿九載民遮道扶携不忍舍去爲
立生祠祀公陞浙江按察使公在嘉興廉聲正氣
滿天下比至浙臬威信益著貪墨吏望風走避盡
革諸司和市鎮守內臣橫日索供萬錢公一符下
杭盡革去未幾內艱一篋自隨惟衣數襲大明律
書數冊而已制終起爲僉都御史巡撫順天永平
戚宦庄田占民者盡奪還民成化二十一年上疏
忤旨左遷雲南按察副使弘治元年陞湖廣按察
使再陞僉都御史巡撫雲南卒於官公好善惡惡
出於天性與人不苟合人亦憚其方嚴居官二十

餘年所至民懷父母吏畏神明忠孝諒直光明俊
偉雖庸人孺子皆知其名或言公別白太明節目
太疏言論太激非知公者也

太子少保樊清簡公

公名瑩字廷璧常山人天順八年進士爲御史巡
兩淮豪有力者憚公清介莫敢撓阻條上清軍事
宜行之著令又巡雲南交人誘邊氓盜掠殺吏民
方議用兵公移諭禍福交人畏御史清梗皆納款
知松江府府故富贍公布衣䟽食孚於士民又議
折徵米穀減布縷征通幹漕法數事行之再知平

陽以黃孔昭薦陞河南按察使未幾尹應天府三年陞南工部侍郎改都御史巡撫湖廣計擒錦田賊酋散解其黨奏省諸藩王營造費金凡百萬計尋以疾致仕薦起撫治鄖陽鄖襄流冗安輯馬鈞陽又薦召爲南刑部侍郎雲南晝晦五日勅公考察雲貴諸吏罷遣千餘人召還部爲尚書十八年致仕正德三年逆瑾誣公妄理隆平侯事及擅減上供布收贖奪其官比瑾誅公卒已三年詔復公官十四年贈太子少保謚清簡公明習律令潔已好修侃侃自樹交遊稀寡人皆敬而畏之

都御史熊莊簡公

公名繡字汝明道州人成化二年進士爲御史坐
事謫清豐知縣累官都御史巡撫延綏操勵潔廉
自甘蔬布餼廩有羨不入私室憂邊練武套虜三
年不大入塞憂去家拜兵部侍郎陞兩廣右都御
史逾年召入南臺正德三年中官李榮忽傳旨熊
繡致仕公屏居山中斷絕書問生事蕭條俯仰益
恬適卒時子已天繼子又天巡撫秦金爲請于朝
贈南刑部尚書明年太僕少卿何孟春上疏曰竊
見致仕故都御史熊繡事母能孝事兄能友居貴

能貧居常能儉數歷中外四十餘年守法徇公推
賢嫉惡不邀時譽不急近功言無爽於屬垣行弗
虧於顧影往年都御史戴珊張敷華卒其門生屬
吏子孫咸請易名主事張鳳翔孔琦卒鄉人請卹
其家 聖朝表勸清賢不吝恩濡繡才節操履無
讓珊等賜謚卹孤惟宸衷軫允幸甚 詔給繡繼
子子端米月一石謚莊簡時有工部侍郎潘禮歸
德人清廉恬退未老乞休弘治間年八十一是撫
韓邦問疏言禮歷官居鄉益堅晚節草廬蔬食不
求安飽節給米月三石南工部尚書胡拱辰淳安

人著勞蹟晚益清謹弘治間御史上其貧薄特給
與廩正德初遣行人存問年九十二贈太子少傅
謚莊懿邦問亦仕至尚書致仕年九十二卒仁和
有王琦字文進舉人乙榜授汝州學正陞御史山
西僉事提學改四川乞致仕歸清介自持不治生
產冬大雪寒僵卧不能出門戶或唁之曰吾求無
愧於心耳雖饑寒無不樂也天順間竟以饑寒卒
臨漳李崙字世瞻篤實莊重雖祁寒暑雨手不釋
卷成化六年進士歷知廬州府陞河南叅政清慎
絕俗吏事克修卒之日貧不能葬妻郝至饑寒守

臣爲奏上得給月米終其身沙河朱裳字公垂正德九年進士少勵清節貧困裕如也提學御史顧潛知裳檄府資裳學京師裳不受躬自炊爨爲御史寒約如故巡按山西山東有風禾人稱裳爲長齋御史爲華昌知府歷浙江副使福建按察使浙江左布政使副都御史治河乞歸再起治河卒清堅自信士頌其廉民懷其惠知友服其不市名饒州孫需字孚吉成化八年進士歷官南京吏部尚書守法畏公議白首清風嶠然不滓雖不能發揚功名有赫赫之譽顧正德間大臣多掎克回還需

獨以廉約稱卒贈太子太保謚清簡絳人陶琰字廷信成化十七年進士歷仕至都御史三理漕事嘉靖初爲工部尚書改南京兵部叅贊機務乞致仕加太子太保歸琰宏才偉度累試繁劇卹園勤民動著聲績中忤權倖屢進屢退方毅直亮喜愠不形自奉儉節每飯一蔬微行罷歸蕭然行李三竹筥相隨者數十年卒年八十四贈少保謚恭介子滋正德九年進士爲武選郎中論大禮謫戍南京有梁材字大用弘治十二年進士常爲令守歷官至戶部尚書清約自勵在戶部國有大役諸塞

有虜警節縮財用不肯加賦於民時朔國公郭勛
寵用事橫費度支金錢百萬計公力摧抑爲勛所
中傷削籍歸卒生理蕭然

尚書陳公

公名壽字本仁新淦人戊籍遼東成化八年進士
弘治元年以都給事中陞大理寺丞御史爭寺丞
勅公吏部尚書三原王公言壽廉正稱執法吏改
南光祿少卿陞卿南鴻臚十三年陞僉都御史巡
撫延綏十六年陞南京副都御史正德元年南京
科道趙璉璉被逮公抗疏救諸言官璉怒奪職八

年薦起遷撫陝西未幾遷南京兵部侍郎九上疏
乞休陞南京刑部尚書致仕初壽在科萬貴妃寵
族人橫甚中官梁方又結妖僧繼曉干國是公疏
論繫詔獄得釋在翰林會火師入寇出奇兵却之
加俸一等既歸田杜門謝客陝西鎮守內臣廖鐘
暴虐吏民楊文襄公言公忠鯁輕去就宜起公撫
陝公至陝清勁鍾畏歛戢比公去陝人號哭擁公
不得行公卒久之都督楊宏陝人也上疏言壽仁
廉恤下知兵能過虜請卹其後公歷官四十年大
半在散地食祿任事不久而庶名最著老無所于

歸諸子旅寓飄泊環堵蕭然歿不能塋父之親舊
相周僅歸其喪公爲言官時直論時政得失無隱
不喜彈劾人曰吾父戒我勿作刑官枉人若言官
枉人尤甚吾不敢妄言文襄公曰宋王素爲諫官
言人材難得無事之時當爲朝廷愛惜程明道爲
御史告君曰使臣拾遺補過則可若搜索臣下短
長以沽直名臣不能也本仁得之矣

論曰 成祖痛懲賊吏然左右大臣亦有好利蓄
貨聚馬者獨段公以清謹受知顧耿年三公皆有
孝肅清獻之風屢遭頑譏非特 聖明幾厝奇禍

軒魯林楊陳五公剛毅直方不可犯顧於民有惠
政樊公熊公清譽孚洽竟與時違不究其用

皇明名臣記第十二卷終

子履準校正